

# REJAB

(Oleh Pencinta Qalam)

Jamadir Akhir yang melayang

Rejab pula menjejak tiang

Memasang layar kemudi digoyang

Melayarkan masa malam dan siang.

Di bulan Rejab tarikh tersurat

Kisah perjalanan Nabi Mikraj

Dengan kehendak Allah al-kudrat

Serbanya ringan sebarang yang berat

Subhanah allazi... Maha Suci Taala

Menjalani hambanya rasul yang a'ala

Melalui langit tujuh petala

Berbagai ajaib dilihat segala.

Malam Rejab 27 haribulan

Dari Masjid al-Haram mula berjalan

Nabi mendarai Buraq handalan

Jibril Mikail jadi taulan

Baitul Maqdis pertama tujuan

Di Masjid al-Aqsa sembayang berkawan

Di datangkan Mikraj tiga bantuan

Muhammad dan Jibril di angkat ke awan

Melalui langit setingkat-setingkat

Dirai hormati sekalian Malaikat

Berjumpa sekalian Nabi berpangkat

Menerima Muhammad barulah berkat

Di Sidrat al-Muntaha kedua berhenti

Jibril tak dapat lagi mengikuti

Datanglah awan Muhammad diselaputi

Mengadap tuhanNya Rab al-Izzati.

Di sinilah menunjukkan ketinggian pangkat

Darjat manusia melebihi malaikat

Manusia yang suci iman iktikad

Sentiasa dicucuri rahmat dan berkat

Mengadap Muhammad dengan roh dan jasadnya

Ketinggian kesucian hadrat Tuhannya

Dengan tiada berkifayah yang dapat ditanya

Lais kamithlih tiap tiap suatunya.

Sujudlah Nabi serta munajad

Kehadrat tuhan kadi al-Hajat

Tuhan wajibkan Muhammad berdarjat

50 sembahyang fardunya sejat.

Selesai munajat nabi perkasa

Balik berjumpa Saidina Musa

Dengan nasihat Muhammad terpaksa

Kembali mengadap Tuhan yang Esa

Mengadap Tuhan ibadah diringankan

Sembahyang mohon dikurangkan

Berulang-ulang permohonan diperkenankan

Akhirnya lima sahaja difardukan.

Lima waktu sehari semalam

Sembahyang ibadah di agama Islam

Dimulakan takbir disudahi salam

Syarat rukun mengandungi di dalam

Sungguhpun fardu hanyalah lima

Diberi keringanan tidak percuma

Dengan 50 pahalanya sama

Demikian kemurahan tuhan halima

Di sini cuba menung sejurus

Fardhu sembahyang perintahnya terus

Kepada Muhammad Saidina pengurus

Mendirikan tiang agama yang lurus.

Sebab itulah digelar nama

Sembahyang itu tiang agama

Jika sembahyang tidak bersama

Ibadah yang lain tidak saksama.

Subuh sebelum fajar menyingsing

Balik ke Mekah nabi pun runsing

KisahNya Mikraj tentulah bisings

Masa dipercayai oleh masing-masing.

Almaklum kisah dengan satu malam

Menjalani Nabi menembusi alam

Mustahil diterima akal yang kalam

Tetapi berkuasa khaliq al-'alam.

Tinggi ketuhanannya akal tak sampai

Usahlah cuba gagau dan capai

Bukanlah boleh raba dan rapai

Kelaknya iman hancur bersepai

Pekerjaan tuhan usah ditempi

Dengan akal pikir merapik

Hikmatnya sejat usah dikopek

Iman yang elok kelaknya sompek.

Bandinglah Adam kejadian syurga

Jatuh ke dunia hidup dan leka

Muhammad ke langit demikianlah juga

Kuasa Tuhan tak dapat diduga

Melainkan jahil akalNya kopiah

Khatam Allah ..... datang mengapit

Serba dipikir suntuk dan sempit

Tanggunglah neraka empunya sempit

Lihat Abu Jahal ayah saudaranya

Menyoal membohong segala-galanya

Abu Bakar Sidiq membenarkan semuanya

Demikian yang lain yang teguh imannya

Tujuan mikraj tinggi hikmahnya

Tuhan mengajar akan rasul-Nya

Melihat sendiri kudrat iradat-Nya

Supaya memandu sekalian hamba-Nya.

Demikian hikmah Rabb al-'Alamin

Mengajar menunjuk Sayyid al-Amin

Terang bergemilang laksana cermin

Tafakur olehmu ayuhai Mukmin

“Apabila kekuasaan yang ada di tanganmu

mengajak menganiayai manusia maka ingatlah

kepada kekuasaan Allah atasmu” – kata

Hakim.